



AN COIMISIÚN
EORPACH

An Bhruiséil, 13.6.2013
COM(2013) 417 final

2013/0191 (COD)

Togra le haghaidh

RIALACHÁIN Ó PHARLAIMINT NA hEORPA AGUS ÓN gCOMHAIRLE

lena leasaítear Rialacháin áirithe i réimse an iascaigh agus na sláinte ainmhithe mar gheall ar an athrú ar stádas Mayotte i leith an Aontais

MEABHRÁN MÍNIÚCHÁIN

1. COMHTHÉACS AN TOGRA

Le Cinneadh 2012/419/AEⁱ, rinne an Chomhairle Eorpach stádas Mayotte i leith an Aontais a leasú le héifeacht ón 1 Eanáir 2014. Dá bhrí sin, ón dáta sin amach scoirfidh Mayotte de bheith ina chríoch thar lear agus beidh sé ina réigiún forimeallach de réir bhrí Airteagal 349 agus Airteagal 355(1) CFAE. Beidh dlí an Aontais i bhfeidhm maidir le Mayotte ón 1 Eanáir 2014.

Tugann an togra seo aird ar iarrataí a rinne údarais na Fraince, go leasófaí *acquis* an Aontais trí bhearta sonracha is infheidhme maidir le Mayotte i réimsí éagsúla, amhail an t-iascach agus sláinte ainmhithe.

Léiríodh sa scrúdú ar an gcás maidir le Mayotte gur gá staid íogair bitheolaíochta a chuid uiscí a chosaint agus, dá bhrí sin, na huiscí timpeall Mayotte a chur faoi raon feidhme Rialachán (CE) Uimh. 850/98 an 30 Márta 1998 maidir le hacmhainní iascaigh a chaomhnú trí bhearta teicniúla chun óg-orgánaigh mhuirí a chosaint. Ar dhóigheanna áirithe, ní mór am breise don Fhrainc chun cloí le *acquis* an Aontais maidir le Mayotte. Tá sé sin amhlaidh go háirithe maidir leis an gclárúchán agus le hoibleagáidí rialaithe i réimse an iascaigh, a mhéid a bhaineann sé le soithí áirithe atá scaipthe timpeall an oileáin agus nach bhfuil aon láithreacha ar leith acu le teacht i dtír.

I réimse na sláinte ainmhithe, dealraíonn sé go bhfuil údar maith le ham breise a thabhairt chun cloí le Rialachán (CE) Uimh. 1069/2009 ó Pharlaimint na hEorpa agus ón gComhairle an 21 Deireadh Fómhair 2009 lena leagtar síos rialacha sláinte maidir le seachtháirgí ainmhithe agus táirgí díorthaithe nach bhfuil ceaptha mar bhia don duine agus lena n-aisghairtear Rialachán (CE) Uimh. 1774/2002, ós rud é nach bhfuil aon acmhainní tionsclaíochta ag Mayotte faoi láthair le seachtháirgí ainmhithe a phróiseáil.

Ar mhaithe le simplíocht agus tapúlacht, measadh go raibh sé fóirsteanach gan dul i muinín tograí aonair do gach ceann de na gníomhartha lena mbaineann ach, nuair is féidir é ó thaobh dlí, na leasuithe ar ghníomhartha éagsúla a chur le chéile in aon togra amháin. Na leasuithe a mholtar sa cháipéis reatha, baineann siad go léir le Rialachán agus tagann siad faoin ngnáthnós imeachta reachtach (Airteagal 289(1) agus Airteagal 294 CFAE).

2. TORTHAÍ AN CHOMHAIRLIÚCHÁIN LE PÁIRTITHE LEASMHARA AGUS MEASÚNUITHE TIONCHAIR

Níor úsáid an Coimisiún measúnú tionchair. Mar sin féin, agus scrúdú á dhéanamh aige ar na saincheistanna éagsúla agus go háirithe ar na hiarrataí a rinne an Fhrainc, bhí teagmháil aige le hionadaithe na n-údarás náisiúnta agus réigiúnach d'fhonn forais na mbeart sonracha a mheas níos fearr.

3. EILIMINTÍ DLÍTHIÚLA AN TOGRA

I gcomhréir le hAirteagal 43(2) CFAE, tugtar an chumhacht do Pharlaimint na hEorpa agus don Chomhairle na forálacha is gá a shainmhíniú chun cuspóirí an Chomhbheartais Iascaigh a bhaint amach.

ⁱ IO L 204, 31.7.2012, lch. 131.

Faoin mbunús dlí sin, tá sé beartaithe ceithre Rialachán ón gComhairle i réimsí an iascaigh a leasú, ag féachaint do chás sonrach Mayotte mar a coimríodh thuas é agus mar a leagadh amach go mionsonraithe sna dréachtaí de na haithrisí:

- Rialachán (CE) Uimh. 850/98 ón gComhairle an 30 Márta 1998 d'fhonn na huiscí timpeall Mayotte a chur san áireamh agus chun cosc a chur le húsáid peaslíonta saighne ar scoileanna de thuinnín agus d'éisc atá cosúil le tuinnín taobh istigh den limistéar 24 míle ó bhonnlinnte an oileáin d'fhonn na báirí d'éisc mhóra imirceacha i gcomharsanacht oileán Mayotte a chaomhnú;
- Rialachán (CE) Uimh. 104/2000 ón gComhairle an 17 Nollaig 1999 maidir le comheagrú na margaí i dtáirgí iascaigh agus dobharshaothraithe;
- Rialachán (CE) Uimh. 2371/2002 ón gComhairle an 20 Nollaig 2002 d'fhonn bearta sonracha a thabhairt isteach maidir le clár na gcabhlach agus an córas rochtana;
- Rialachán (CE) Uimh. 639/2004 ón gComhairle an 30 Márta 2004 chun an plean forbartha a a chuir an Fhrainc faoi bhráid Choimisiún Tuinníní an Aigéin Indiaigh (IOTC) a thabhairt isteach mar leibhéal tagartha d'acmhainneacht an chabhlaigh atá cláraithe i gcalafoirt Mayotte agus chun a cheadú don Fhrainc cur lena cabhlach fad le cuspóirí an phlean forbartha sin;
- Rialachán (CE) Uimh. 1224/2009 ón gComhairle an 20 Samhain 2009 d'fhonn foráil a dhéanamh maidir le bearta idirthréimhseacha agus maoluithe sealadacha ó rialacha áirithe maidir le rialú na soithí iascaireachta d'fhonn oibleagáidí rialaithe agus cuspóirí uile an Rialacháin sin a chomhlíonadh de réir a chéile.

De bhun Airteagal 168(4)(b) CFAE, tá Parlaimint na hEorpa agus an Chomhairle i dteideal bearta a ghlacadh i réimsí na tréidliachta agus na fiteasláintíochta a bhfuil sé mar chuspóir díreach leo an tsláinte phoiblí a chosaint.

Faoin mbunús dlí seo, tá sé beartaithe Rialachán (CE) Uimh. 1069/2009 ó Pharlaimint na hEorpa agus ón gComhairle an 21 Deireadh Fómhair 2009 a mhodhnú d'fhonn idirthréimhse cúig bliana a thabhairt don Fhrainc maidir le Mayotte, lena cheadú di an bonneagar is gá a bhunú chun seachtháirgí ainmhithe a aithint, a láimhseáil, a iompar, a chóireáil agus a dhiúscairt.

4. IMPLEACHT BHUISÉADACH

Níl aon tionchar ag an togra seo ar bhuiséad an Aontais Eorpaigh.

Togra le haghaidh

RIALACHÁIN Ó PHARLAIMINT NA hEORPA AGUS ÓN gCOMHAIRLE

lena leasaítear Rialacháin áirithe i réimse an iascaigh agus na sláinte ainmhithe mar gheall ar an athrú ar stádas Mayotte i leith an Aontais

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 43(2) agus Airteagal 168(4)(b) de,

Ag féachaint don togra ón gCoimisiún Eorpach,

Tar éis an dréachtghníomh reachtach a chur chuig na parlaimintí náisiúnta,

Ag féachaint don tuairim ó Choiste Eacnamaíoch agus Sóisialta na hEorpa¹,

Ag féachaint don tuairim ó Choiste na Réigiún²,

Ag gníomhú dóibh i gcomhréir leis an ngnáthnós imeachta reachtach,

De bharr an méid seo a leanas:

- (1) Le Cinneadh 2012/419/AE³, rinne an Chomhairle Eorpach stádas Mayotte i leith an Aontais a leasú le héifeacht ón 1 Eanáir 2014. Dá bhrí sin, ón dáta sin amach scoirfidh Mayotte de bheith ina chríoch thar lear agus beidh sé ina réigiún forimeallach de réir bhrí Airteagal 349 agus Airteagal 355(1) CFAE. Beidh dlí an Aontais i bhfeidhm maidir le Mayotte ón 1 Eanáir 2014. Is iomchuí foráil a dhéanamh do bhearta sonracha áirithe a dtugann cás sonrach Mayotte i roinnt réimsí bonn cirt dóibh.
- (2) I réimse an iascaigh agus na sláinte ainmhithe, ba chóir na Rialacháin seo a leanas a leasú.
- (3) Maidir le Rialachán (CE) Uimh. 850/98 ón gComhairle an 30 Márta 1998 maidir le hacmhainní iascaigh a chaomhnú trí bhearta teicniúla chun óg-orgánaigh mhuirí a chosaint⁴, ba cheart na huiscí timpeall Mayotte a chuimsiú faoi raon feidhme an Rialacháin sin agus ba cheart úsáid peaslíonta saighne ar scoileanna de thuinnín agus d'éisc atá cosúil le tuinnín taobh istigh den limistéar 24 míle ó bhonnlínte an oileáin a thoirmeasc d'fhonn na báirí d'éisc mhóra imirceacha i gcomharsanacht oileán Mayotte a chaomhnú.
- (4) Maidir le Rialachán (CE) Uimh. 104/2000 ón gComhairle an 17 Nollaig 1999 maidir le comheagrú na margaí i dtáirgí iascaigh agus dobharshaothraithe⁵, i bhfianaise scéimeanna margaíochta Mayotte, scéimeanna atá an-ilroinnte agus tearcfhorbartha, leagfadh cur i bhfeidhm na rialacha maidir le lipéadú táirgí iascaigh ualach ar mhiondíoltóirí atá díreireach leis an bhfaisnéis a thabharfaí don tomhaltóir. Is iomchuí,

¹ IO C , , lch. .

² IO C , , lch. .

³ IO L 204, 31.7.2012, lch. 131.

⁴ IO L 125, 27.4.1998, lch. 1.

⁵ IO L 17, 21.1.2000, lch. 22.

dá bhrí sin, foráil a dhéanamh maidir le maolú sealadach ó na rialacha maidir le lipéadú táirgí iascaigh a thairgtear le miondíol leis an tomhaltóir deiridh in Mayotte.

- (5) Maidir le Rialachán (CE) Uimh. 2371/2002 ón gComhairle an 20 Nollaig 2002 maidir le caomhnú agus le saothrú inbhuanaithe acmhainní iascaigh faoin gComhbheartas Iascaigh⁶, ba cheart bearta sonracha a thabhairt isteach maidir le clár na gcabhlach agus an córas rochtana.
- (6) Ar an gcéad dul síos, tá cuid thábhachtach de chabhlach na Fraince a bhíonn ag oibriú ó Roinn Fhrancach Mayotte comhdhéanta de shoithí ar lú ná 9 méadar iad agus atá scaipthe timpeall an oileáin, nach bhfuil aon láithreacha ar leith acu le teacht i dtír, agus gur gá fós iad a aithint, a thomhas agus a fheistiú le huirlisí íosta sábháilteachta le gur féidir iad a áireamh sa chlár de shoithí iascaigh an Aontais; mar thoradh air sin, ní bheidh an Fhrainc in ann an clár sin a chríochnú go dtí an 31 Nollaig 2016. Ba cheart don Fhrainc clár sealadach de na cabhlaigh a tharraingt suas, rud a ráthódh go bhféadfaí soithí na deighleoige sin a aithint ar bhonn sonraí íosta d'fhonn iomadú soithí iascaireachta neamhfhoirmiúla a sheachaint.
- (7) Ar dara dul síos, is gá gníomhaíochtaí áirithe iascaigh sna huiscí sin a theorannú do shoithí atá cláraithe i gcalafoirt Mayotte, chun staid íogair bitheolaíochta na n-uiscí timpeall an oileáin sin a chosaint, agus geilleagar áitiúil an oileáin a chaomhnú, agus an cás struchtúrach, sóisialta agus eacnamaíoch a chur san áireamh.
- (8) Maidir le Rialachán (CE) Uimh. 639/2004 ón gComhairle an 30 Márta 2004 maidir le cabhlaigh iascaireachta atá cláraithe sna réigiúin is forimeallaí sa Chomhphobal a bhainistiú⁷, is gné ar leith de Mayotte é nár socraíodh aon chuspóir dá chabhlach faoi Rialachán (CE) Uimh. 2371/2002 a thagraíonn do Chlár Treorach Ilbhliantúil 1997-2002. Maidir le hacmhainní éisc a chaomhnú, is iomchuí acmhainn iascaireachta na gcabhlach a uasteorannú ag na leibhéil reatha, go háirithe do dheighleoig na soithí móra a bhfuil mórachmhainneacht iascaireachta iontu. Mar sin féin, le haghaidh soithí beaga, ós rud é gur chuir an Fhrainc plean forbartha faoi bhráid Choimisiún Tuinníní an Aigéin Indiaigh (IOTC), plean a léiríonn an éabhlóid a bhfuil súil léi ar an gcabhlach atá bunaithe in Mayotte, plean nár chuir aon pháirtí conarthach den IOTC, lena n-áirítear an tAontas, ina aghaidh, is iomchuí cuspóirí an phlean sin a úsáid mar leibhéil thagartha d'acmhainneacht an chabhlaigh atá cláraithe i gcalafoirt Mayotte agus a cheadú don Fhrainc cur lena cabhlach suas go dtí cuspóirí an phlean forbartha.
- (9) Maidir le Rialachán (CE) Uimh. 1069/2009 ó Pharlaimint na hEorpa agus ón gComhairle an 21 Deireadh Fómhair 2009 lena leagtar síos rialacha sláinte maidir le seachtháirgí ainmhithe agus táirgí díorthaithe nach bhfuil ceaptha mar bhia don duine agus lena n-aisghairtear Rialachán (CE) Uimh. 1774/2002⁸, ba cheart a thabhairt faoi deara nach bhfuil aon acmhainní tionsclaíochta ag Mayotte chun seachtháirgí ainmhithe a phróiseáil. Is iomchuí, dá bhrí sin, go dtabharfaí tréimhse cúig bliana don Fhrainc d'fhonn an bonneagar is gá a bhunú chun seachtháirgí ainmhithe in Mayotte a aithint, a láimhseáil, a iompar, a chóireáil agus a dhiúscairt i gcomhréir iomlán le Rialachán (CE) Uimh. 1069/2009.
- (10) Maidir le Rialachán (CE) Uimh. 1224/2009 ón gComhairle an 20 Samhain 2009 lena mbunaítear córas rialaithe Comhphobail d'fhonn chomhlíonadh rialacha an chomhbheartais iascaigh a áirithiú, lena leasaítear Rialachán (CE) Uimh. 847/96,

⁶ IO L 320, 5.12.2001, lch. 7.

⁷ IO L 102, 7.4.2004, lch. 9.

⁸ IO L 300, 14.11.2009, lch. 1.

(CE) Uimh. 2371/2002, (CE) Uimh. 811/2004, (CE) Uimh. 768/2005, (CE) Uimh. 2115/2005, (CE) Uimh. 2166/2005, (CE) Uimh. 388/2006, (CE) Uimh. 509/2007, (CE) Uimh. 676/2007, (CE) Uimh. 1098/2007, (CE) Uimh. 1300/2008, (CE) Uimh. 1342/2008 agus lena n-aisghairtear Rialacháin (CEE) Uimh. 2847/93, (CE) Uimh. 1627/94 agus (CE) Uimh. 1966/2006⁹, dealraíonn sé nach mbeidh an Fhrainc in ann cloí le hoibleagáidí rialaithe uile an Aontais don deighleog "Mayotte. Speicis pheiligeacha agus ghrinnill. Fad <9m" de chabhlaigh Mayotte faoin dáta ar a mbeidh Mayotte ina réigiún forimeallach. Soithí na deighleoige sin, atá scaipthe timpeall an oileáin, níl aon láithreacha ar leith acu le teacht i dtír agus is gá fós iad a aithint. Ina theannta sin, ní mór oiliúint a chur ar iascairí agus ar rialtóirí agus an bonneagar riaracháin agus fisiceach iomchuí a chur ar bun. Is gá, dá bhrí sin, maolú sealadach a fhoráil ar rialacha áirithe maidir le rialú na soithí iascaireachta agus maidir lena saintréithe, a gcuid gníomhaíochtaí ar muir, a bhfearas agus a gcuid gabhálacha ag gach céim ón soitheach go dtí an margadh i leith na deighleoige sin den chabhlaigh. Mar sin féin, d'fhoill ar a laghad cuid de na cuspóirí is tábhachtaí i Rialachán (CE) Uimh. 1224/2009 a bhaint amach, ba cheart don Fhrainc córas rialaithe náisiúnta a bhunú, a ligfeadh di gníomhaíochtaí na deighleoige sin den chabhlaigh a rialú agus faireachán a dhéanamh orthu agus oibleagáidí tuairiscithe idirnáisiúnta an Aontais a chomhlíonadh.

- (11) Ba cheart Rialacháin (CE) Uimh. 850/98, (CE) Uimh. 104/2000, (CE) Uimh. 2371/2002, (CE) Uimh. 639/2004, (CE) Uimh. 1069/2009 agus (CE) Uimh. 1224/2009 a leasú dá réir sin,

TAR ÉIS AN RIALACHÁN SEO A GHLACADH:

Airteagal 1

Leasuithe ar Rialachán (CE) Uimh. 850/98

Leasaítear Rialachán (CE) Uimh. 850/98 mar seo a leanas:

- (1) In Airteagal 2(1), cuirtear an méid seo a leanas in ionad pointe (h):

“(h) Réigiún 8:

Na huiscí uile amach ó chóstaí ranna Francacha La Réunion agus Mayotte atá faoi fhlaithreas nó faoi dhlínse na Fraince.”;

- (2) Cuirtear an tAirteagal 34a seo a leanas isteach i ndiaidh Airteagal 34:

"Airteagal 34a

Srianta ar ghníomhaíochtaí iascaireachta sa chríos 24 míle timpeall oileán Mayotte

Toirmiscfear ar shoithí úsáid a bhaint as aon pheaslíonta saighne ar scoileanna de thuinnín agus d'éisc atá cosúil le tuinnín taobh istigh den limistéar 24 míle ó chóstaí oileán Mayotte, arna dtomhas ó na bonnlínte óna dtomhaistear uiscí teorann.”

Airteagal 2

Leasú ar Rialachán (CE) Uimh. 104/2000

In Airteagal 4 de Rialachán (CE) Uimh. 104/2000, cuirtear mír 3a a leanas isteach i ndiaidh mhír 3:

⁹ IO L 343, 22.12.2009, lch. 1.

“3a. Go dtí an 16 Nollaig 2016, ní bheidh feidhm le mír 1, mír 2 ná mír 3 maidir le táirgí a thairgtear lena miondíol leis an tomhaltóir deiridh in Mayotte.”

Airteagal 3
Leasuithe ar Rialachán (CE) Uimh. 2371/2002

Leasaítear Rialachán (CE) Uimh. 2371/2002 mar seo a leanas:

(1) In Airteagal 15, cuirtear isteach mír 5 agus mír 6 mar seo a leanas:

- “5. De mhaolú ar mhír 1, déanfar an Fhrainc a dhíolmhú go dtí an 31 Nollaig 2016 ón oibleagáid na soithí atá níos lú ná 9 méadar ar fhad foriomlán agus a oibríonn ó Mayotte a chur san áireamh ina clár de shoithí iascaireachta an Aontais.
6. Go dtí an 31 Nollaig 2016, coinneoidh an Fhrainc clár sealadach de shoithí iascaireachta atá níos lú ná 9 méadar ar fhad foriomlán agus a oibríonn ó Mayotte. Sa chlár sin beidh, i gcás gach soithigh, ar a laghad, a ainm, a fhad foriomlán agus cód aitheantais.”

(2) Cuirtear isteach an tAirteagal 18a seo a leanas i ndiaidh Airteagal 18:

"Airteagal 18a

Mayotte

De mhaolú ar Airteagal 17, in uiscí suas le 100 muirmhíle ó bhonnlinnte Mayotte, féadfaidh an Fhrainc iascach a shrianadh do shoithí iascaireachta atá cláraithe i gcalafoirt Mayotte, bíodh sé sin i gclár soithí an Aontais nó sa chlár sealadach dá dtagraítear in Airteagal 15(6), ach amháin i gcás soithí de chuid an Aontais a bhíodh ag iascach, sa dá bhliain roimh an 1 Eanáir 2014, sna huiscí sin ar feadh 40 lá ar a laghad sa mhéid nach mó iad ná an iarracht iascaireachta a dhéantaí go traidisiúnta.”

Airteagal 4
Leasú ar Rialachán (CE) Uimh. 639/2004

I Rialachán (CE) Uimh. 639/2004, cuirtear isteach an mhír 1a a leanas i ndiaidh mhír 1:

"Airteagal 1a

Cabhlach Mayotte

1. De mhaolú ar Airteagal 1(1)(a), beidh na leibhéil thagartha do shoithí iascaireachta atá cláraithe i gcalafoirt Mayotte, bíodh sé sin i gclár soithí an Aontais nó sa chlár sealadach dá dtagraítear in Airteagal 15(6) de Rialachán (CE) Uimh. 2371/2002, cothrom le hacmhainneacht an chabhlaigh sin an 31 Nollaig 2013.

Mar sin féin, le haghaidh soithí iascaireachta atá idir 8 méadar agus 12 mhéadar ar fhad foriomlán agus a úsáideann spiléir agus le haghaidh soithí iascaireachta atá níos lú ná 9 méadar ar fhad foriomlán, beidh an leibhéal tagartha cothrom leis an acmhainneacht dá bhforáiltear sa phlean forbartha a chuir an Fhrainc faoi bhráid Choimisiún Tuinníní an Aigéin Indiaigh an 7 Eanáir 2011.

2. De mhaolú ar Airteagal 13 de Rialachán (CE) Uimh. 2371/2002, déanfar an Fhrainc a údarú le hacmhainneacht nua a thabhairt isteach sna deighleoga cabhlaigh atá sainithe le haghaidh soithí iascaireachta atá idir 8 méadar agus 12 mhéadar ar fhad foriomlán agus a úsáideann spiléir agus le haghaidh soithí iascaireachta ar lú ná 9 méadar ar fhad foriomlán iad gan acmhainneacht choibhéiseach a tharraingt siar.”

Airteagal 5

Leasú ar Rialachán (CE) Uimh. 1069/2009

I Rialachán (CE) Uimh. 1069/2009, cuirtear an méid seo a leanas in ionad Airteagal 56:

"Airteagal 56

Teacht i bhfeidhm

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh feidhm leis ón 4 Márta 2011.

Mar sin féin, beidh feidhm le hAirteagal 4 maidir le Mayotte ón 1 Eanáir 2019. Déanfar seachtháirgí ainmhithe agus táirgí díorthaithe a gineadh in Mayotte roimh an 1 Eanáir 2019 a dhiúscairt i gcomhréir le hAirteagal 19(1)(b).

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.”

Airteagal 6

Leasú ar Rialachán (CE) Uimh. 1224/2009

I Rialachán (CE) Uimh. 1224/2009, cuirtear isteach an mhír 2a a leanas i ndiaidh mhír 2:

"Airteagal 2a

Córas rialaithe an Comhphobail a chur i bhfeidhm ar dheighleoga áirithe de chabhlach na roinne Francaí thar lear Mayotte

1. Go dtí an 31 Nollaig 2016, ní bheidh feidhm ag Airteagal 5(3) agus Airteagail 6, 8, 41, 56, 58 go 62, 66, 68 agus 109 maidir leis an bhFrainc i leith soithí iascaireachta ar lú ná 9 méadar ar fhad foriomlán iad agus a oibríonn ó Mayotte, i leith a gcuid gníomhaíochtaí ná a ngabhálacha.
2. Faoi 1 Eanáir 2014, bunóidh an Fhrainc scéim náisiúnta rialaithe a bheidh infheidhme maidir le soithí iascaireachta ar lú ná 9 méadar ar fhad foriomlán iad agus a oibríonn ó Mayotte. Cloífidh an scéim leis na riachtanais seo a leanas:
 - (a) údarás amháin, a bheidh lonnaithe in Mayotte, a chomhordóidh gníomhaíochtaí rialaithe na n-údarás áitiúil uile;
 - (b) déanfar rialú, cigireacht agus forfheidhmiú ar bhonn neamh-idirdhealaitheach;

- (c) áiritheoidh an scéim rialú na ngabhálacha de na speicis atá faoi réir bhainistiú Choimisiún Tuinníní an Aigéin Indiaigh agus de na speicis atá faoi chosaint;
 - (d) áiritheoidh an scéim rialú rochtana ar na huiscí timpeall Mayotte, go háirithe ar limistéir atá faoi réir ag srianta rochtana is infheidhme maidir le deighleoga áirithe den chabhlach;
 - (e) socróidh an scéim mar thosaíocht an cuspóir gníomhaíochtaí iascaireachta timpeall an oileáin a mhapáil d'fhonn an bonn a ullmhú le haghaidh gníomhaíochta spriocdhírithe maidir le rialú.
- (3) Faoi 30 Meán Fómhair 2014, cuirfidh an Fhrainc plan gníomhaíochta faoi bhráid an Choimisiúin ina leagfar amach na bearta atá le déanamh d'fhonn cur chun feidhme iomlán Rialachán (CE) Uimh. 1224/2009 ón 1 Eanáir 2017 a áirithiú maidir le soithí iascaireachta ar lú ná 9 méadar ar fhad foriomlán iad agus a oibríonn ó roinn Fhrancach Mayotte. Beidh an plan gníomhaíochta ina ábhar comhphlé idir an Fhrainc agus an Coimisiún. Déanfaidh an Fhrainc gach beart is gá leis an bplan gníomhaíochta sin a chur chun feidhme.”

Airteagal 7
Teacht i bhfeidhm

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil,

Thar ceann Pharlaimint na hEorpa
An tUachtarán

Thar ceann na Comhairle
An tUachtarán